

TALKING POINT

BRIG. JEN. DATO' PROF. DR. KAMARUDIN HUSSIN

NAIB CANSELOR

UNIVERSITI MALAYSIA PERLIS

SEMPENA PROGRAM TITIAN KASIH

PADA 9 APRIL 2011

DI SEKOLAH RENDAH KEBANGSAAN CINA CHIN HUN

KUALA SANGLANG

Bismillah Hirrahman Nirrahim

Mengadap Raja Muda Perlis, Duli Yang Teramat Mulia Tuanku Syed Faizudin Putra Ibni Tuanku Syed Sirajuddin Jamalullail, merangkap Tuanku Canselor Universiti Malaysia Perlis (UniMAP) dan Raja Puan Muda Perlis, Duli Yang Teramat Mulia, Tuanku Hajah Lailatul Shahren Akashah Khalil, merangkap Tuanku Pro Canselor UniMAP.

Ampun Tuanku sembah patik mohon diampun,

Adalah patik dengan segala hormat takzimnya, memohon ampun merafak sembah menjunjung setinggi-tinggi kasih di atas perkenan Duli-duli Tuanku bercemar Duli berangkat ke "Program Titian Kasih Di Sekolah Rendah Kebangsaan Cina Chin Hun" ini.

Ampun Tuanku, patik memohon izin dan limpah perkenan Tuanku untuk patik memberi sepatah dua kata kepada para hadirin. Ampun Tuanku.

Yang berusaha pengacara majlis,

Yang Berusaha Pengetua Sekolah Rendah Kebangsaan Cina Chin Hun..(Nama)...

Wakil – wakil Media,

Seterusnya para pelajar dan hadirin yang saya hormati sekalian.

Assalamualaikum Warahmatullahi Wabarakatuh dan Salam Satu Malaysia

Selamat Pagi, Good Morning, Kalai Vannakam, Zao Shang Hao.

Alhamdulillah, bersyukur kita ke hadhrat Allah SWT kerana diberi keizinan olehNya untuk sama-sama kita berkumpul pada pagi ini dalam Program Titian Kasih di Sekolah Rendah Kebangsaan Cina Chin Hun.

1Malaysia diwujudkan oleh Y.A.B Perdana Menteri Malaysia Datuk Seri Najib Tun Razak pada 2 April 2009. Intipati gagasan ini idea satu bangsa tanpa mengira kepelbagaian etnik, sub-etnik dan kebudayaan.

Matlamat 1Malaysia adalah untuk mengekalkan dan meningkatkan perpaduan di dalam kepelbagaian ini yang selama ini menjadi kekuatan kita dan akan kekal sebagai bekalan terbaik kita untuk masa hadapan.

Di dalam konsep 1 Malaysia ini, kerajaan menekankan sikap saling hormat menghormati dan bersikap menerima di antara satu sama lain, oleh itu penerapan nilai 1 Malaysia ini amat sesuai diterapkan sejak di peringkat sekolah lagi.

Guru merupakan pemangkin dalam pembangunan modal insan akan juga berperanan meningkatkan penghayatan 1Malaysia di kalangan pelajar dan rakyat negara ini.

Guru perlu menterjemahkan gagasan 1Malaysia dalam pengajaran, pembelajaran dan elemen modal insan yang dapat

membentuk jati diri setiap pelajar, disebabkan itulah Kementerian Pelajaran Malaysia memperkenalkan Kurikulum Standard Sekolah Rendah (KSSR) pada tahun ini. Kurikulum ini menggabungkan beberapa subjek menjadi satu selain turut akan memperkenalkan satu subjek baru yang bertema semangat kenegaraan dan patriotik.

Penerapan nilai-nilai mulia ini adalah amat penting kerana mereka ini merupakan modal insan yang akan mewarisi kepimpinan negara kelak. Jadi di sinilah peranan yang perlu dimainkan guru sebagai usaha mencapai matlamat tersebut di samping usaha menyatu padu masyarakat berbilang kaum di negara ini. Bak kata pepatah “Melentur buluh biarlah dari rebungnya”

Rasanya tidak perlulah untuk saya bercakap panjang pada pagi ini. Sebelum mengakhiri ucapan, izinkan saya menyampaikan serangkap pantun:

**Kayuh Basikal Pergi Ke Kota,
Hendak Membeli Kemeja Merah
Di Mana Lagi Negara Tercinta
Malaysia Bumi Tumpah Darah**

Ampun Tuanku sembah patik mohon diampun,

Sekian sahajalah ucapan patik pada pagi ini. Bagi mengakhiri ucapan patik ini, patik bagi pihak Universiti Malaysia Perlis sekali lagi merafak sembah menjunjung setinggi-tinggi kasih di atas perkenan Duli-duli Tuanku bercemar duli berangkat ke Program Titian Kasih di Sekolah Rendah Kebangsaan Cina Chin Hun ini.

Ampun tuanku. Sekian, Wabillahi Taufik Walhidayah Wassalamualaikum Warahmatullahi Wabarakatuh. Terima Kasih.